

光緒永嘉縣志

永嘉縣志卷之三十七

襍志二

遺聞

謝康樂守郡愛永嘉有東山之勝且山水尤美於會稽乃創第鑿池於積穀山之下迎母太夫人來養欲定居焉未幾陞臨川內史遂攜其子鳳及長孫超宗以行而留其次孫超祖侍祖母太夫人於永嘉之第至臨川爲有司所劾謫廣州尋死於誣太夫人憂患而卒葬於所居第之城東飛霞洞之左不復有東歸之志於是遂爲永嘉人謝夢符鶴陽謝氏宗支記夢符號問樵宋咸淳中仕郡庠經諭記作於元大德三年自超祖以下二十世名詵第五五公者遷居相

溪之鶴陽
蓋宋初也

溫士在程門十一人周行己許景衡劉安節安上戴述鮑若雨沈躬行謝佃潘旻陳經正經邦經德經鄂實十三人在朱門十二人周端朝葉味道陳埴戴蒙林武錢木之徐寓徐容沈倅蔣叔蒙包定及姪顯道敏道詳道平陽志又有林湜蔡譽實十六人南軒門一人周去非也溫亦自有學始於王景山林石最盛者曰薛季宣鄭伯熊陳傳良至葉適益顯宋史儒林傳一卷中薛陳葉及蔡幼學戴溪有五人焉自宋及元諸儒皆有著述盛矣哉

息園閣識
見府志

溫士馳名太學者元豐有九先生周許二劉沈蔣及戴述

趙霄張輝也寶祐六君子陳宜中黃鏞劉黻林則祖陳宗魯唯也名見宜中本傳景定三年皆賜進士然惟宜中劉黻林則祖實係溫人黃鏞諸人皆台產也

同上

李邦蒼墩人崇寧中擢武科端方忠毅宣和初授成忠郎從童貫征遼爲步騎將領至燕山與遼兵遇度必致死乃

截鬚授從者遣馳歸報家曰吾死戰以是爲識家人竟奉

餚葬於鄉之日溪南山隴弟邦挾策淮甸間悼兄歿於王

事辭榮而歸

李氏
譜錄

溫州經總制錢乾道元年止趁及三分之二守臣王述奏乞減額未報二年八月本州海溢浮蕩灤江數萬餘家朝

命唐琢往勘回奏乞減額二分于是薛尙書良朋鄭少卿
伯熊吳檢正龜年共言於廟堂乞減額戶部持之不下會
良朋請對乞依唐琢所奏三年有旨從之

陳謙永溢編見歐乘補

康執權字平仲

按歐乘補誤作字伯可

河南祥符人龍圖閣直學士

建炎閒扈蹕至永嘉因家焉乾道丁亥八月己卯卒贈銀

青光祿大夫時年九十有一葬于孝義鄉正興院後山之

左顧人郝氏附焉

宋戶部侍郎向伯奮康公墓誌

葉水心作汪參政墓誌有曰左右執政共持國論參政蓋
與秦檜同時者汪之孫爲浙東憲綱不平之請改水心不
許答曰檜時執政某未有言其善者以先公厚德故勉爲

之自謂已極稱揚猶以爲未足邪水心死後刊文集者爲
刪去左右執政四字非水心意也

舊志

趙忠定令水心草詔序所以立嘉王之故云病無嘗藥之人崩乏居喪之主忠定不敢用易之水心云禍將作矣立君大事不明言其故必有小人造謗興讟以禍諸君者竟不言功隨卽去國未幾韓侂胄果誣忠定貶死水心不受賞亦不受禍可謂知幾君子

同上

周端朝張衡徐範蔣傅林仲麟楊宏中皆出譖惟周受禍略備初自廷尉聽讀衢州已次半道有旨再赴廷尉周始自分必死時憲聖在上韓猶不敢殺士故欲以計殺之周

竟不死復聽讀永州杜門教授生徒後以韓誅放還復籍
於學爲南宮第一人

四朝聞見錄

林溫生延祐丁巳八月八日以春秋登至正辛巳江浙鄉
闈試第一是科董彝第四董朝宗第五朱公選第二十八
實殿榜後榜中孔暘王孔文高祿卿潘如珪皆再薦後溫
以恩例任奉化州學正董彝亦爲學正慶元彝慨然曰吾
父嘗出應書大父得奇夢記諸籍云丁巳年九月七日夜
夢林溫作魁朱姓人鎖榜第四第五連姓董內四名用硃
筆點云是舊請舉者稽之於今無有不合其最異者溫之
生甫一月耳

舊志
下同

洪武三年五月二十一日中書吏部奉旨選天下教官入
觀奉天門適太史奏文星見親擢十八人俱爲監察御史
次日詣武樓下賜袍帶二十五日之任臺官傳令賜宴永
嘉許宏士樂清李時可瑞安馬漢平陽孔希普俱與選按
明實錄與選者十九人

宣德乙卯春郡守何文淵進諸生講經於明倫堂有羣蜂
擁一巨蜂飛集楹閒聲如雷郡守顧謂諸生曰羣蜂中有
巨蜂爲之主猶士林中有鉅儒爲之領袖此來科狀元之
兆耳明年周旋果狀元及第

正統丙辰狀元周旋楊文貞所取一甲三卷未決狀頭問

同事有識周旋儀表者否其人以面白豐美對遂以旋卷首晉及臚唱陞見貌寢甚衆論悵然蓋所問者周旋所答者淳安周瑄也數之前定如此

王瓊初讀禮於開元寺僧舍有芙蓉五月盛開遂於宏治丙辰聯科及第瓊少貧販鹽爲業值寒夜泊舟仙洋應氏之船枋主人有異夢款留之妻以女後以榜眼厯官司成少宗伯謚文定應之物色亦奇矣

王子孝諍隨其父鍊之任竹山敎諭其邑藍氏女夢有都御史來游園主人奇其夢詰旦伺之乃子孝也卽以是女妻之後果至僉都御史

關尹子一篇徐藏得之永嘉孫定宋景濂以爲卽定僞撰
果爾則吾邑藝文此宜第一而孫定學識不凡居然可見
卓越字彥材福寧人舉景泰庚午鄉薦知永嘉縣廉而不
阿提舉市舶中貴至縣索貨越卽抑其爪牙中貴怒將笞
越越佯解衣受笞誠臺吏先竄越擒中貴廁之中貴讐服
請盟盟定乃各更衣備賓主禮而去改金鄉縣邑人祀之

福寧府志

永嘉朱叟去吾州學正五十年而其邑人陳子繼之莊秀
才遜學後先獲事焉乞余言爲贈曰東嘉繼美東嘉比東
魯禮樂何轍轍窺經見崔服問姓乃朱陳先後博士師作

我婁侯賓絳帳宛如舊青衿俱已新惟應垂白者猶是守

元人

王弇州集

順天蕭鳴鳳精於星學官郡守以不職罷歸舟次遇比部
張公璁張素聞蕭術神試以祿命叩之布算良久不言因
問之曰祿命書從此可焚矣問何故蕭曰僕閱人多矣無
不中者獨於僕與君而失之張曰何也曰僕自揣祿位應
至方伯而今止於二千石觀君之命不出三年便當入相
而君猶然郎署也豈吾術有未至邪遂別去文忠入京僅
三載以議大禮中上意遂大拜旣貴憶蕭公言卽起之十
餘年果至方伯而卒

舊志

羅峯翁雖入相得君其家人常穿兩截衣服家有子姪放
債踏算佔田害人嘗親撻而面詈之或令縣官枷號以警
怙勢作威者此皆保全族人之道也

項喬歐東私錄

滴水巷在華蓋山西北舊志云晉太守王羲之嘗臨墨池
試筆據元豐二年十二月真華觀戶帖則本觀五嶽殿王
右軍祠堂卽墨池故地今亡其處滴水亦不知何水也唐
張又新詩序云滴水巷在華蓋山西北流入郡城涓涓不
盈不竭謝公與從弟書地無佳井賴華蓋山北湧出一泉
名爲滴水卽此水也滴水泠泠徹碧沙旱時無減水無加
澄清好是爲官侶引入孤城一帶斜

陂海

璣譚

永嘉蘭亭刻本宋理宗收入內府列在丙集蓋集諸本共一百一十有七裝潢十冊永嘉之刻特其一耳後歸賈平章繼歸錢唐謝氏陳仲醇云永嘉蘭亭是智永臨寫宋紹興開太守程邁刻寘郡齋筆勢雖縱逸而未免失真首行會字亦全末有孫綽後序是唐乾封二年僧懷仁集書又有吳傳朋題識具在

輟耕錄考
梁遺事

湧祐壬寅於臨安客舍見永嘉一士人藏一法帖乃唐人硬黃仿右軍書前有金字御筆云王右軍長者帖後有宣和玉瓢樣御寶

洞天清錄

顧駿之畫在永嘉法空寺

畫錄唐裴孝源公
私畫史作法王寺

永嘉名書有唐僧書金字法華經藏於郡城壽寧禪寺荆
溪結空院唐季有僧惠昇結廬北巖道滿居山南滿能詩
昇工柳書嘗寫法華經至普賢勸法品天雨舍利二顆建
牙鄉玉清觀御史中丞譏記節度使程詢書丹宋吳說書
證道歌於淨光禪寺米元章書周侃龍泉院記鐫諸石後
爲黃文簡昇去不知所終王綽撰先賢祠記瓜廬薛師石
以篆書刻石於郡庠又有明倫堂養源堂二扁延祐閒翰
林院待制趙公舉筆書法清麗黃公潛譏容成道院碑記
不知何人書丹字亦俊雅已上諸蹟今已亡矣江心寺有
宋高宗御書清輝二字扁尚存沿光字被元季方國珍竊

去西山虎跑寺有陳氏世德碑趙文敏筆也湖石穹窿載以龜趺居民不奈官府揭印鏽壞下端數十餘字且屹立荒區雨暘淋炙日漸損泐惜哉

岐海
璣譚

陶宏景永嘉邑居圖考之地志玉環之木流

按應作櫺
亦作瀋

與

賢宰鄉之永寧山永寧鄉之綠嶂山清通鄉之烏石白泉山均爲宏景流連之所見有遺蹟存焉第不知所圖者果何屬耳蘇長公云能使江山似永嘉永嘉山川秀甲海內著名非一日矣

宣和畫譜宋御府藏有張旭永嘉帖

俱同上

周咸富文學有氣節仕止縣令其子思友亦讀書善談論

攜有松雪大洞玉經標首趙松雪墨蹟五字卽感筆也長
可二丈裱者裂斷之司寇王陽德跋趙書此經謂右軍北
海出入結構中則當是松雪真蹟

書畫跋

文信號雪山永嘉人此卷是其自書所作五言律七言絕
句凡八詩不著歲時梁中丞以雪山題趙彥徵畫卷在洪
武六年六月證之謂此卷是洪武初年所作則爲元人無
疑以題扇詩中有江南南京國鍾峰駐馬之語前詩所稱聽
宣諭者也

翁方綱復初齋文集

永嘉林叔睿所藏端石馬蹏樣深紫色厚寸許面徑七八
寸有鄭魁銘詩云仙翁種玉芝耕得紫玻璃磨出海鯨血

鑿成天馬蹏潤應通月窟洗合就雲溪常恐魑魅奪山行亦自攜

何達春
諸紀聞

瓜廬翁每與四靈聚吟獨主古淡融狹爲廣夷鏤爲素神悟意別自然清空荆山劉植跋云瓜廬耕釣于會昌湖上多肥遯之詞抒性情之正得象外之趣酌準繩之嚴宋詩紀事明代三元惟商文毅一人溫則有武三元永嘉王名世萬麻丁酉順天鄉試戊戌會試廷試皆第一

舊志

貞義書院聖旨在五都姚溪張孚敬未第時讀書於此及入相嘉靖七年具奏奉聖旨卿所奏足見篤學以勉就後來之意書院名與做貞義堂名更做抱忠仍著彼處有司

就書院中蓋敬一亭一座以置朕之五箴抱忠堂門等處

或有損壞亦與修葺

舊志

吾甌刻漏舊在子城南譙門上卽今之衛治前譙樓也

衛治

今爲城守管署永嘉譜云本之燕肅制度極精後梁尚書汝嘉再

作用古水稱法尋以用不效復舊制淳熙中火陸郎中之

淵始命藝士陳宗武改制宗武參呂才燕肅二家法定爲

銅壺三日夜天池日天池平水壺萬水壺下水海一視呂

才增退水壺改燕肅四十八箭爲二十四冬至夏至各用

一箭春分秋分共一箭餘二十一箭品分氣候用之其餘

大略依舊法淳熙戊申樓宗丞鑰別立刻漏於小廳頗采

宗武法而壺差小以日夜增水各三人不勝煩始創意於三壺之後別立大架旁設梯級上置圓斛比夜天池之大六之日一增水令極滿亦置銀管注水易夜天池平蓋爲木盤比銅荷柄指北以受水又於其後增一銀管亦以漆竹行之入於退水壺視舊法爲便余覩今譙樓所存刻漏爲天順五年辛巳周守琰重鑄其款識稱舊者敝於火闕之有年相傳謂舊者遷於省城朝天門不知何據復綴一銘曰挈壺有職司彼天時壺既敝矣職何攸司振頽舉廢厥職在誰我吏茲土盍不圖斯稽古而制曰模曰規于以合天毫髮無差君子莅政弗亟弗遲民樂厥生興息有期

作銘紀勝載頌雍熙

岐海
璣譚

譙樓鼓更點舊管鼓八角十一更以鼓點以鉦鉦閒款識
云梁貞六年歲次庚辰使司給到角舊以漆竹乾道九年
始倣軍前式改造昏時吹角五人爲三疊撾鼓六人鼓
三百三十三槌爲一通角十二聲爲一疊角聲止乃各撾
鼓千爲三通凡三角三鼓而畢更三點至五點凡再發申
刻惟吹角三疊爲小引後吹角者久矣而撾鼓無聞夫徭
額雖存而專役不設更點測盤香爲候或密或疏初無定
則其視刻漏爲長物更點爲末務古稱有善政者更點分
明司民牧者尙念之哉

同上

許涉齋及之儒志編序云築室城東隅豐湖王氏譜云今之元妙坊上善橋南樹坊名曰儒志宋郡守楊蟠所建蓋王氏先世自閩來甌居瑞安西峴山下至儒志先生之父遷郡城明倫里六世孫益大字居安厯官右文殿修撰自號芹邊居士以所居在郡庠之東也益大子名與字與之築室華蓋積穀兩山間創業謝池里蓋明倫元妙謝池居第相望也攷儒志坊萬麻康熙兩府志俱不載附見王景山傳中乾隆府縣志始附見坊表之末而云未詳其處蓋未深攷請得而互證之蘇平仲開元寺興造記云開元寺在元妙坊東舊志無元妙坊名今補入康熙府志下馬臺在元妙坊宋

高宗謁天慶宮神御時於此下馬天慶宮卽開元寺萬廩
府志尙膳橋在開元寺巷中知元妙坊尙膳橋之所在卽
知儒志坊之所在尙膳橋又名上善亦名讓善蓋音相近
而異其文耳又儒志先生裔孫光世爲其父處士幽堂志
云世居郡庠之東郡表其坊爲儒志以彰其里焉明劉觀
槐陰書屋詩序亦云所居在郡庠之東其坊以儒志名子
孫處斯里者先後第宅相望則儒志坊塙在今之府學巷
與王氏譜所稱上善橋南許氏城東隅之說合夫明之東
山書院在華蓋山乃先生講學之所今之東山書院在積
穀山麓實先生發祥之地尤足深高山仰止之思數典而

忘其可乎況儒志一坊爲永嘉學派淵源所自而前後修志者畧而不書書而不詳其地卒無人焉起而表章之良足慨已今旣補錄載列三十六坊記於坊表中而詳攷之如右

儒志
坊攷

耿逆之亂知縣馬公殉難姪穎姿被害子逸姿尙幼家人抱出託生員李謙受謙受轉託生員潘殿颺抱回撫養二人皆馬公門生忠臣有後固由天佑而冒險存孤則二君亦迥乎難及也

周聲炳
子事實冊

一說潘賡

廷颺

與馬公有舊

公被害賡遽入縣署負其幼子逸姿出匿之崑陽家中得免逸姿卽後爲江蘇督糧參議者也

又見陳遇春雙忠祠
記謂竄人襁而出渡

江自焦山梅與小京韓埠入崑陽匿之潘氏合三說觀之可以知其詳矣

瑣記

王梅溪讀書江心寺寺中住持真歇了禪師知其爲龍種時寺前埂子山門屢築不就將成卽有龍攬波濤潰之一日梅溪大醉禪師進曰公能捨山門前一塊土乎公必中狀元無疑矣就之乞書券梅溪醉中戲書與之其後禪師坐山門乘涼有一老人拄杖而來攜一童子索地出券示之泣然泣去至今寺中寶藏其券焉王應奎柳南續談按謝詩亂流趨正絕孤嶼媚中川蓋孤嶼在兩峯之間自受券後築成平地以沒其蹟今圓通殿大士蓮座下是其遺址也

甄龍友字雲卿少有俊聲詞華奇麗而資性浮躁於鄉人

無不狎侮木待問蘊之爲尤甚木生朝爲詞賀之末云聞

道海壇沙漲也明年蓋諺云海壇沙漲溫州出相明年者

俗言且待也又嘗損益前人酒令曰鬼魅魍魎魁木以癸

未魁天下也一日登對上問卿安得與龍爲友甄罔然不

知所對既退乃得之曰何不云堯舜在上臣安得不與夔

龍爲友聞者惜之

齊東野語

案龐元英談數云雲卿游

笑倩兮美目盼兮彼美人兮西方之人兮孝廟臨幸一見

賞之詔侍臣物色其人或以甄姓名聞曰是溫州狂生用

之且敗風俗上曰惟此一人朕自舉之以爲某邑宰後召對不稱旨猶得添俸官至國子監簿

劉錫祖父掩據羲之墨池且百年後爲世僕所發太守留

公茂潛斷其廬得池於臥內劉氏遂衰其臨政操斷皆類

是葉紹翁四
朝聞見錄

永嘉有百篩瀨鄉人斷水捕魚宰生禱祭祈多獲逾時了無所得眾侶忿怨棄業將罷其夕夢見一老人云諸君且可小停忽聞有跳躍聲驚起視之乃巨魚也剉以爲鮆頓

獲百篩因名瀨焉

劉敬叔異苑

蔡襄造洛陽橋夢大士以須溫州三人一日至方可成於是遣人至溫訪之一日使者見有三人其二俱瞽其一又僅一日坐河頭分柑而食使者度必此三人乃前致詞已而三人者諭使者先回輒同下一井而沒及使者回泉州三人者已先至矣故至今名其地曰分柑河頭蔡君謨洛

陽橋碑記載其事

歐乘補
按分柑河在華蓋里沙巷
口其井相傳卽今興文坊鐵欄井

東坡云余在惠州有永嘉羅漢院僧惠戒來謂曰明日當還浙東問所欲幹者予無以答之獨念吳越多名僧與子

善者常十九偶錄此數人以授惠戒使歸見之致予意且

爲道予居此起居飲食狀以解其念也信筆盡紙語無倫

次又當尙有漏落者方醉不能詳也紹聖二年三月二十

三日東坡居士書

志林
按永嘉城內有羅漢寺宋詩符閒賜名崇信院

林靈素盛時一日有詔兩學之士問道靈素旣陞座首詔太學博士王俊久而不出旣出乃昌言昔我先聖與老朋同德比義相與師友豈有摵衣禮黃冠者哉聞者駭然

周輝清
波濶志

林靈素作神霄錄自公卿以下羣造其廬拜受獨李綱傳
崧卿曾幾移疾不行

因學紀聞

薛叔仔字德先紹定中任平南尉庚子辛丑溫郡薦饑發
廩煮賑至一萬八千餘石奏聞擢官江南東路兵馬副都
監嗣知化州會縮戍丐祠寶祐甲寅進呈中興四朝志傳
經武要畧今上日厯會要玉牒等書

陳懋卿欽薛
叔仔墓誌

林邦福字大彥溫父也初署常山尉歸浙省左丞擢爲鄉
郡知事時山寇竊發掠慈湖將窺城上下洶洶乃白府單
舸走賊巢諭以禍福皆俯首退去爲良如初有司上其功

尋以疾卒葬永之建牙鄉

宋景濂文集

陸務觀野廟記云甌越閒好事鬼山椒水濱多淫祀其廟貌有雄而毅黝而碩者則曰將軍有溫而厚哲而少者則曰某郎有媼而尊嚴者則曰姥有容而艷者則曰姑其居處則敞之以庭堂峻之以陞級上有老木攢植森拱蘿葛翳其上鴟鴞室其閒車馬徒隸叢雜怪狀農作之毗怖之大者椎牛次者擊豕小不下犬雖魚菽之薦牲酒之奠缺于家可也缺于神不可也一朝懈怠禍亦隨之耋孺畜牧慄慄然病疾死喪毗不曰適丁其時而自惑其生悉歸之于神雖然以古言之則戾以今言之則庶乎神之不足過

也

岐海
理譚

谷良號確菴宣德正統歲荒捨粟賑濟又捨米千石倡創
大雲寺築唐嶺竹浦嶺路三十餘里遵例出金百兩助軍
御史陳公瓊爲題名董儲館石

阮存谷處士墓誌

谷譜號循菴正

德聞歲歉捐穀六百斛賑之又輸粟助之邊儲郡守楊公
旦具達授義官谷俊字士毅捐穀六百石授七品

谷氏譜

張昌明景泰甲戌應詔輸粟京庾授七品散官張乾成
化丙戌應詔輸粟五百斛於預備倉又進粟京庾充邊儲
授七品散官張謹成化癸卯陝西荒歉應詔輸粟七百斛
授散官張積宏治壬子募民入粟修荒政因獻七百石備

賑又輸萬金於官事聞授冠帶義官勅贈南京國子監典籍張一環萬厯閒歲歉捐粟於郡預備倉又應詔輸粟七百斛旌表義士榮膺冠帶

張氏譜

膠凍一味吾溫素未有製之者曩有人治病取石首膠煮化充劑因過稀薄不堪用又不忍棄置遂條解和以辣醯反成佳味且善於補腎凡冬月供盤殮備筵宴靡不需之者惟吾地獨有之他處未之見

岐海璣譚按即今之魚膠

曾七如號七道士名衍東山東嘉祥人乾隆壬子舉人爲楚北令緣事謫戍來甌居郡西曾氏依綠園之旁名其地曰小西湖性落拓不羈工詩好古硯書畫篆刻尤精筆墨

狂放自榜其門曰掛冠自昔曾騎虎閉戶于今好畫龍慕
鄭板橋爲人常日難得糊塗赦後貧老不能歸卒於溫著
有小豆棚集啞然集嘗作元宵燈鼓圖題云驚人歲月千
搥鼓老我乾坤百盞燈讀之令人有勝事長新年華暗老
之感也

彭左海濤曾七如小傳

柳彬道光十九年以選貢判溫州明敏剛正有幹才邑之
八都呂家岸積年盜藪官不能治民患苦之雖褊小村落
歲必納金若干希幸免增貢生葉冠瀛訴其事於彬請親
往搜捕彬許諾卽選幹役於端午夜冒雨直抵賊巢竟獲
渠魁盜風寢息民至今尸祝之

採訪冊

葉紹祉字次尹號廉齋習申韓業乾隆閒同郡張遐齡出
守雲南大理葉從游佐幕心存利物與張講求政治主賓
相得民懷其惠芒市民泊六崗頭人公送揚旗頌謝其旗

正面書青天師太老爺葉清廉勤慎嚴謹夷方收糧平斛
用夫有法愛民如子萬民感激百世留名合地頂祝芒市
安撫司治下子民暨六崗頭人衆等銜結頂祝不朽上謝
共六十三字背面書夷字如蟲篆不可識至今其家猶寶
藏之

周藕農衣德
見國乘補

姚梁號佃芝虎州慶元人僑寓永嘉以進士通籍累官至
山左按察使子魯培號洙楷聰穎異常年十四隨父至粵

西經岳陽樓詩曰岳陽樓上淡斜暉岳陽樓邊秋雁飛乾
坤吳楚此終古廊廟江湖誰與歸斷岸樹依懸酒旆遠波
帆颶掠漁磯蒼茫何處聞湘瑟一點君山綰翠微惜甫游
泮水年未弱冠而亡戚學標鶴泉文鈔有傳

歐乘補

陳瀾號秋槎永嘉場人嘉慶丁卯舉人後改名乙金以教
習期滿銓授湖北建始縣道光壬辰赴任舟泊餘干縣麥
皮坂夜半失足溺焉子楠情急援之亦溺明晨子抱父屍
出人咸驚異以爲孝感所致

案楠係孝子本可詳請表後據餘干縣來文則以子

楠墜水其父以救子故並罹厄情節迥異此事必

由地方官詣驗詳報豈亦傳聞失實耶姑兩存之

劉上書習醫相傳嘗遊飛霞洞遇吹簫道人授以秘訣自

是醫業日進專以婦科行子孫蕃衍今多世其業

歐乘補

萬家傑字興士黔中人能詩工書畫孱弱多病落落寡合隨父宦金陵父歿遊橐匱當道攜至歐城道光癸未歲卒年二十有四初疾作自撰墓志云生而茫茫死也何傷彭殤齊誕大塊文章題曰水雲子墓旁書冢下人自題鐫石訖攜僕遊東山步至東北隅海壇側命僕云我死必葬此及卒僕以告當道因遂其志營冢而樹其石以誌不忘予於癸未秋覽生詩畫甲申春經其冢感生之數奇而情曠也詩以弔之蘇榮陶富等棲塵落魄天涯幻此身萬古長眠孤徵客一杯誰奠九泉人小兒造化從天厄大塊文章

特地新欲認本來真面目浮雲傳像水傳神

曾立勸隨意消遣集

市井七才子其詩有膾炙人口者季碧山秋夜云雲峯猶

剩夏露氣已生秋薄暑消今夕新涼動故愁予懷成渺渺

離思寄悠悠俯仰無終極星河徹夜浮默坐思無端高歌

興浩然秋風起衰草涼露咽寒蟬清響趨羣動殘釭照獨

眠平生負豪氣奄忽又經年皆楚楚可人黃巢松之三徑

菊通雲外屋一溪梅放雪中山亦佳祝聖源鼓兒天詞云

鼓兒天詩人夜未眠茶烹活火品新泉茶兒熟鼓兒促繫

繫驚醒鄰兒哭鄰兒哭古月生霜照寒屋亦覺新穎張丙

光子名森字柔木亦能詩工雅過於乃父著有山樓吟稿

泰順董霞樵爲之訂定郡博陸曉峯先生嘗稱其春草詩最

綿麗可喜

陳遇春筆記

永嘉縣志卷之三十八

襍志三

辨誤

方志之書類皆據摭舊文更相沿襲不暇致詳然或以增益而滋訛或以攷訂而轉謬自矜駁治未能究厥指歸其弊亦與疏略者等則裨補闕漏糾正瑕疵胥有待於後人敢蹈襲謬沿訛之咎耶今竊取顏氏匡謬正俗之義聊就見聞所及獻厥箴規以效愚者之一得若云發墨守鍼膏肓則吾豈敢至有傳聞異辭不能衷於一是者則別出之爲存疑云

三元縣志 卷之二十一
疆域誤

舊志形勝引王十朋綠畫軒記峯巒奇偉林麓靜深環合
映帶

案綠畫軒在樂清去玉簫峯二十里所記與永嘉無涉
且此係名勝非形勝也今削

山川誤

羅浮山舊志在江北岸華嚴山下又載合山

案合山卽羅浮山不應兩載辨見輿地山川

石門山舊志在府城北十五里賢宰鄉附謝靈運詩二首

案靈運所遊是青田石門今磨崖詩刻猶存見枯蒼金

石志舊志湯志俱附謝詩誤矣辨又見輿地山川

芙蓉山湯志在四十四都清通鄉引隋書地理志永嘉有

芙蓉山

案隋時永嘉一縣兼有溫州五縣之地志所稱芙蓉山似卽雁蕩山雁蕩有芙蓉峯下有芙蓉村故名然境內亦自有芙蓉山一統志云有三峯聳立紅赤相映如芙蓉與樂清接界是矣宋陳虞之禦元兵於芙蓉巖卽此在仙居鄉四十八都今云四十四都清通鄉亦誤

甌江舊志東受樂清之象浦

案象浦在三十六都俗名烏牛浦舊有村莊亦名象浦

與樂清館頭相隔里許三十六都各村溪流俱從此浦南出入港乃指爲樂清地誤矣

華嚴山舊志有黃巖洞

案黃巖卽華嚴之誤蓋土音華黃二字不分而載筆者遂從俗書之

右軍帖云華嚴石硯今有作黃巖石硯者其誤僚然亦有作黃巖山者則尤誤矣

石室山舊志引嘉靖志在城東七十里又引寰宇記石室山南溪入一百二十里有石室可坐千人

案石室山在永嘉場寰宇記所稱宜移入大若巖下在城西北一百二十里亦名石室山不得混而爲一舊志

誤湯志亦誤

風俗誤

隋書地理志少爭訟好歌舞婦人勤於紡織有夜浣紗而
旦成布者俗謂之鷄鳴布

案此條本與永嘉無涉隋書云豫章之俗少爭訟好歌

舞勤於紡績非指永嘉也舊志據甌江逸志云云並未

檢隋書原文此剽竊碑版之陋習也又祝穆方輿勝覽

有此文好作尙舞字下有婦人二字隋志無則竟引祝書可耳今更正

明胡用賓禁約二條

物產誤

案胡用賓樂清知縣永嘉職官無其人舊志誤

倒生松

案松以倒生得名乃形之奇古者耳非別有一種也入之物產殊誤

夾竹桃舊志入木屬又見花屬

案夾竹桃宜入花屬一物兩收誤

金沙舊志引府志郡圃中有金沙花附錄王十朋種金沙花戲呈景盧詩

案梅溪詩乃守饒州時所作蓋饒之郡圃與永嘉無涉
阮廣舊志引薛季宣思石門遊詩注出石門山中阮類猿
而綠猿類狗而黃蓋猴屬之大者

案浪語集詩有軒轅邱一夢懷往意悠哉之句注云石門之上有軒轅之邱軒轅邱在青田石門舊志誤樂清志引之亦誤也

鬚魚舊志引游宦紀聞三山溪中產小魚斑文赤黑相間里中兒叢之角勝負聞永嘉亦有之案永嘉並無此魚傳聞不足據也

祠祀誤

舊志卓忠貞祠在江心寺祀明戶部侍郎卓敬附鮑嘉蘊
悼忠貞詩湯志卓忠毅公祠在郡城南隅萬麻閒移建江中孤嶼附劉
康社重修卓忠貞廟碑文又康
祉悼忠貞詩張德明悼忠貞詩

案劉記乃瑞安卓忠貞祠非江心卓祠也鮑劉張三詩亦當入瑞安舊志湯志誤

古蹟誤

筆亭浙江通志引縣志云縣治西北郭公山有晉郡守王羲之筆亭久圯今字蹟猶存

案舊志富覽亭額係晉王羲之筆亭久圯字蹟猶存通志改易數字而以筆字屬下句讀遂標筆亭之名誤矣此條係通志之誤舊志本不誤然恐後之修志者援引通志之文別出一筆亭爲古蹟則誤矣故附辨於此

浮沚書院舊志引萬麻府志宋儒周恭叔故居

案恭叔所居乃浮沚也有自撰浮沚記可證後人卽其

地創建書院而以浮沚名則浮沚當入古蹟不得竟以書院爲恭叔故居也

池上樓舊志引太平寰宇記謝公池在州西北積穀山之東

案謝公池在州東南不得云西北又在積穀山之西不得云山之東此皆舛誤之甚者今不錄

問水亭在學署後煉丹井上

案永嘉學宮圖作活水亭蓋取朱子爲有源頭活水來之義圖列卷首可證舊作問水亭誤

大雲寺淨光禪寺崇德寺飛霞觀金雞嶺

案已上三寺一觀俱見寺觀不得又列古蹟應刪金雞
嶺亦宜改入山水門今更正

職官誤

南北朝張進之舊志職官安固人永寧令領校尉又見義
行傳

案南史本傳進之永嘉安固人歷五官主簿永寧安固
二縣領校尉考其文義領校尉三字乃歷叙官階而并
及之非縣令兼官也宜削去又安固卽瑞安旣曰永嘉
安固人則非永嘉人矣入義行傳中亦誤

唐永寧縣令程振康熙府志不載乾隆志據唐書程務挺

傳補錄府志同

案本傳務挺父曰名振凡六見今刪去名字誤一隋河南郡有永寧縣非永嘉之永寧誤二名振初仕竇建德在隋大業末俄棄賊自歸高祖詔授永寧令使率兵經畧河北永寧在河南故也時江淮以南羣盜竊據如李子通杜伏威沈法興輩而苗海潮方據永嘉豈能越江淮數千里而令東越乎武德初次第削平浙東西郡縣初入版圖武德五年以縣置東嘉州析置永寧安固橫陽樂成四縣見唐書地理志此置永寧之始苗海潮亦於六年三月始降見高祖紀時程名振已轉洺州刺史

封東平郡公矣此誤收而并改其名蓋不及詳考地理年代及上下文而滋譌者也又次永寧令於永嘉令之下亦誤

朱縣令詹夬作詹夫胡衍作胡衡周佖作周佖趙汝掄下作黎定趙大猷作范大猷府志同

案已上舊志均誤辨見職官門各條下

元縣尉王楚山舊志云遇賊戰死之見名宦帖木傳

案今舊志名宦中並無帖木傳及王楚山事見府志武宦帖木傳中則府志二字自不可省

人物誤

漢蔡敬則舊志武功

案蔡敬則瑞安人光和間舉孝廉見瑞安縣志選舉及人物循吏傳壇廟墳墓皆有之舊志誤

唐葉一源字九江其先括之松陽人大父格心徙永嘉因家焉一源幼有志操能詩書習騎射云云見舊志忠臣

案瑞安志引葉水心廟記云徙永嘉之安陽東郭蓋安陽屬永嘉郡故各志誤作永嘉人今永心集亦無此文故削之節錄於此

宋王景山舊志儒林引萬厤府志云初名開祖府志同案宋史藝文志儒志編一卷王開祖撰許及之序云先

生名開祖字景山 國朝四庫全書總目同陳謙儒志
先生學業傳亦云王景山諱開祖惟舊志儒林傳標題
景山而曰初名開祖不知其何所本也

元蔣允汎舊志儒林

案允汎青田人詳下經籍條今改入寓賢

宋徐誼舊志名臣引宋史本傳乾道八年進士後知建康
府移知隆興府卒

案水心集知隆興府徐公墓誌有徐寅者相王審知寅
之孫薄其官遜於平陽自號處士處士廟於沙岡爲別
祖是誼世爲平陽人康熙府志亦作平陽人舊志誤

宋方睦舊志見文苑又見隱逸明謝廷循見文苑又見方

技張天麟見武功又見仕績所載事實大同小異

案已上三人均一人兩傳誤

又案舊志人物如名臣業已立傳又列其名於他傳

中注云傳見名臣此亦與一人兩傳無異非志體也

宋錢敬直舊志文苑引葉適錢敬直墓誌字敬予以祧廟

諱改名易直字季莊

案墓誌稱敬直忠懿王九世孫五世祖尙徙溫州樂清爲其邑人又稱祖堯卿紹興中舉孝廉因表其居曰孝廉里樂清志堯卿居白石是敬直實樂清人舊志誤

國朝翁應春舊志文苑著蚩冷符

案蚩冷符應作諭癡符本顏氏家訓舊志妄改

國朝鄭如夔舊志文苑

案如夔樂清人僑寓永嘉見樂清志附傳今改寓賢宋陳侃舊志孝友又見義行作陳侃

案宋史陳侃附許祚傳侃卽侃字之俗體舊志兩傳事蹟皆不引宋史一引萬厤府志一引明一統志互有詳畧實一人一事也遂作兩人失考

明張鳴鸞舊志仕績

案鳴鸞自有傳而其父張純傳中又附見殊贅

晉張薦舊志隱逸永嘉人有高操隱居樂清丹霞山郡守

王羲之訪焉不獲見而去

案永嘉郡記樂成縣民張薦隱居頤志不應辟命王右軍聞而造之是文君實樂清人舊志誤

後五代蔣湛舊志隱逸傳引浙江通志有高操刺史季廣琛建牙持牒詣其家徵之不就至今名其鄉曰建牙

案蔣湛爲蔣渙之弟據水心集蔣行簡墓誌云蔣氏本陽羨人梁普通初蔣渙爲永嘉守從弟湛以西華奇山也留居不歸武帝賢而官之命後守卽廬授焉故鄉名建牙是渙與湛並蕭梁人無疑而萬厔府志載蔣渙爲溫州刺史在後梁開平閒與水心集不合又水心集但

曰梁武帝命後守卽廬授湛官不詳後守姓名而乾隆

府志則以後守爲季廣琛

萬曆康熙府志不載

萬曆志職官門梁

溫州刺史蔣渙後亦有季廣琛考舊唐書肅宗紀上元

二年正月溫州刺史季廣琛爲宣州刺史則廣琛自是

唐人旣非後梁溫州刺史又與蔣渙渺不相涉乾隆府

志乃沿浙江通志之誤以蔣渙後守爲廣琛尤誤中之

誤不足辯也吳任臣十國春秋亦云蔣渙季廣琛相繼

爲溫州刺史吳書援據多疏舛此條蓋卽襲地志誤文

要之蔣渙自是蕭梁永嘉太守季廣琛自是唐溫州刺

史與後梁並無涉水心集述蔣氏先世當据其家狀謀

舊文必無差誤舊唐書爲劉昫所脩去李唐時代不遠
所載亦必可依據今据此二書參互考定以蔣湛收入
蕭梁寓賢而刪季廣琛三字後之脩郡志者宜以蔣換
歸之蕭梁以季廣琛歸之李唐庶不爲舊志所誤矣

宋鄭泰臣舊志隱逸

案卽趙清獻集之鄭賡字泰臣所載事實與趙詩注合
府志不載其名題曰鄭泰臣亦失攷舊志作泰臣誤

宋徐必友舊志隱逸鐸孫政和間屢薦不起隱柏洋山下
案徐鐸熙寧九年狀元平陽人必友見平陽志隱逸柏
洋山亦在平陽舊志誤

明何白舊志隱逸

案何白樂清人今改入寓賢

明劉康祉舊志隱逸與仕績之劉康祉相混

案劉康祉字以吉見仕績此係康祉之誤康祉字幼安一仕一隱截然兩人社祉二字以字形相近而誤國朝侯思炳舊志隱逸

案府志思炳樂清人亦見樂清志隱逸舊志誤

明郭純舊志方技引東里集初名文通精繪事太宗賜名純擢營繕所丞洪熙初陞閣門使

案黃淮介菴集樂清人永樂中淮嘗薦之得召見賜名

純志以爲邑人誤以成祖爲太宗尤誤

明柳楷湯志方技

案府志選舉楷以童子舉官中書舍人瑞安人湯志誤唐包全舊志寓賢引府志字子周會稽人舉貞元乙丑進士官福州長溪令自會稽入永嘉至安固寓庫村

案庫村爲今泰順地唐時屬安固非永嘉也舊志誤

唐崔道融舊志寓賢引府志荆南人自稱東甌散人著東浮集九卷乾寧乙卯永嘉山齋編成蓋避地於此者

案道融以徵辟爲永嘉令後避地入閩見全唐詩鈔小傳舊志誤今補入職官

五代吳畦舊志寓賢注云傳詳名臣

案名臣無吳畦府志有之所居乃安固庫村非邑境唐書五代史俱不載其人蓋譜家附會之詞未可信也宋朱熹舊志寓賢引府志乾道閒館樂成講道東臯山麓其往來小徑名文公巷

案文公巷在樂清既言館樂成於永嘉無涉舊志誤

宋徐定舊志仕績寓賢兩見

案徐定泉之晉江人娶永嘉鮑氏因家焉應入寓賢不宜復入仕績舊志誤

宋阮存舊志選舉鄉薦下云進士有傳

案明進士阮存傳詳仕績宋進士無阮存名今削

經籍誤

蔣允汝尙書通考 大學章旨 中庸詳說 四書條類

蒼巖先生文集

乾隆府
縣志

案蒼巖蔣訓導允汝萬厤府志乾隆志並有傳考東甌詩集有蔣文質注云字彬夫永嘉人號蒼巖所載字號與允汝同而名特異王齋自撰壙志云登蒼巖先生蔣公文質之門則文質卽蒼巖無疑其作允汝或入明以後所改也然陳高蒼雪軒記云蔣君文質舊居栝之青田後僑居永嘉其所述與舊府縣志稱蒼巖蹤跡亦合

則蒼巖本貫青田所著書卽不宜收入今刪

參溫州經籍志下同

俞德鄰佩韋齋輯聞詩說一卷佩韋齋文集十六卷

雍正

通志乾隆府志乾隆志
作佩韋齋輯聞四卷

案至順鎮江志元俞德鄰永嘉平陽人宋寶祐中父卓爲廬江令僑寓京口因家焉有佩韋齋文集十六卷輯聞四卷宋濂俞希魯墓碑亦云先生之先居溫之平陽大父某爲廬江令始遷鎮江父德鄰鄉貢進士是德鄰已爲鎮江人非永嘉人今刪

薛季宣伊洛遺禮

伊洛禮書補亡

萬曆乾隆府志有伊洛遺禮乾隆志有伊

洛禮書補亡雍正通志
二書並題陳傅良集

案此二書薛陳二先生行狀並不載考陳亮龍川集有
伊洛禮書補亡序云吾友陳傳良爲余言薛季宣士隆
嘗從袁道潔游道潔蓋及事伊川自言得伊洛禮書欲
至蜀以授士隆道潔死無子不知其書今在何所伊川
嘗言舊修六禮則信有其書矣道潔之所藏近是惜其
書之散亡而不可見也因集其遺書以爲伊洛禮書補
亡又書伊洛遺禮後云伊洛遺禮其可見者惟婚與喪
祭僅存其一二今以附諸補亡之後然則二書皆亮所
撰文獻通考錄之亦不題陳薛二先生撰舊志蓋因序
中述二先生語遂誤據收入今刪

蘇太古古禮書敘畧

王柏魯齋集乾隆志

案蘇太古事蹟無考惟金履祥仁山集有送三蘇君序曰愚翁先生蘇公來官金華其三秀從焉長曰太古仲曰佩韋季曰會心皆所以號也又有九月初永嘉蘇太古同游金華洞夜宿鹿田寺詩是太古乃別號非名也考萬厤府志寶祐癸丑進士有蘇文洪瑞安人佩文齋書畫譜引王魯齋集蘇基先溫之瑞安人登寶祐癸丑第初調臨安府浙江稅終金華令科第履貫同而名不同仁山集所稱愚翁先生或卽基先歟則非永嘉人也南宋人稱溫人爲永嘉蓋用永嘉郡舊稱今不著於錄

李倫家禮酌中

萬時府志作酌中
慶樂清縣志作酌宜

案李倫樂清人舊志誤今刪

朱文簡學庸圖說

乾隆府縣志

案文簡樂清人見樂清志舊志誤

戴厚經解三卷

乾隆志

案經義攷作經解三十卷舊志誤

戴仔非國語辨

乾隆志

案戴守鏞非國語辨篇見慎江文徵經義攷亦著錄然

非單行著述今刪

陳謙謝修撰墓誌

雍正通志
乾隆志

案直齋書錄解題謝修撰行狀墓誌一卷昭武謝師稷務本行狀里人黃通撰墓誌陳謙撰因有與黃氏行狀合刻單行本故著於錄謝氏旣非溫人陳誌亦非著述

今刪

張叔椿建安志二十四卷

萬麻府志
乾隆志

案直齋書錄解題建安志二十四卷刪定官郡人林光撰慶元四年郡守永嘉張叔椿俾僚屬成之是此志本林光所撰張春卿守建安令僚屬補成之非出春卿手纂今刪

張聲道岳陽乙志三卷

乾隆府
縣志

案聲道淳熙進士瑞安人舊志誤

李至剛耽羅志畧三卷

乾隆府縣志

案至剛樂清人孝光從子舊志誤

項喬董子故里志六卷

雍正通志乾隆府縣志

案天一閣書目董子故里志李廷寶撰又甌東私錄董子遺事志序畧云某叨先生故里守嘗欲繼絕世脩故墓而苦無端緒景守李廷寶適志遺蹟遺文及先賢所嘗贊記云六卷而以序屬余是董子故里志實景州守李廷寶所作甌東特序其書耳非卽所著也今刪

林武朱子語錄

萬曆府志雍正通志乾隆府縣志

包定池州語錄

雍正通志乾隆府縣志

府縣志

案朱子語錄宋代傳本至夥黎靖德編語類卷首列記
錄姓氏凡九十七家采摭詳博並無林武包定所記且
池州語錄爲嘉定乙亥李道傳所集黎書載道傳自叙
明白可據塙非包定所編此二書皆不足信今刪

鄭景望蒙齋筆談

雍正通志乾隆府縣志

案四庫全書總目蒙齋筆談二卷舊本題宋鄭景望撰
商濬刻之碑海中厲鶚宋詩紀事亦曰景望湘山人生
元豐元祐間有蒙齋筆談今考其書乃全錄葉夢得巖
下放言之文但刪其十之三四而顛倒其次序濬蓋誤

刻僞本今刪

周達觀誠齋襍記二卷

雍正通志乾隆府縣志

案四庫總目誠齋襍記二卷舊本題元林坤撰前有永嘉周達觀序稱坤會稽人所著書凡十二種此乃其一誠齋坤自號也他書誤爲達觀所著舊志承其謬今刪釋法樞鐵關和尙語錄二卷

乾隆志

案妙覺眞空大師法樞平陽人舊志誤

釋啟元太初語錄

萬厤志乾隆府縣志

案乾隆府志仙釋傳啟元作啟原日本人吳元年航海入中國後入安固抵石山駐錫是啟元乃倭產今刪

倪濤玉谿集二十二卷

萬麻府志雍正通志乾隆府縣志

案直齋書錄解題玉谿集二十二卷左司員外郎永嘉
倪濤巨濟撰其父始徙居廣德云云又案東都事略文
藝傳宋史文死傳並作廣德軍人蓋其父始徙廣德至
巨濟已爲土著直齋題永嘉蓋據舊貫言之耳今刪

徐泳橫槊醉藁

乾隆府縣志

案泳見平陽志武科橫槊醉藁亦見書目舊志武科無
泳名而經籍收之誤矣

萬規東平先生集

乾隆府縣志

案萬規見樂清志人物東平先生集見書目舊志誤

孔子升潔菴集

乾隆府縣志

案子升名陽平陽人元進士潔菴集凡十二卷蘇伯衡爲之序見平陽志舊志誤

盧摯疎齋集

乾隆

案元詩選三集盧摯字處道號疎齋涿郡人著有疎齋集據此是盧疎齋乃涿州人乾隆府縣志文苑傳別載盧摯字處道永嘉人善詩文與高明齊名其字與疎齋同疑卽一人舊志相沿誤載耳今刪

東甌王氏平冤錄一卷

見焦氏經籍志疑卽王淵無冤錄

案無冤錄乃王與所撰非淵也

陳雷瀛菴集

乾隆府縣志

案列朝詩集甲集前編陳雷字公聲嘉興人秀民之子有瀛菴集蓋秀民僑居嘉興其子已著籍於彼舊志誤

高友璣南屏遺藁

乾隆府縣志

案友璣樂清人舊志誤

姚汝循錦石山齋集

雍正通志乾隆府縣志

案千頃堂書目汝循字敘卿上元人

明詩綜亦作上元人通志引

黃目作永嘉人蓋偶據誤本府縣志悉沿其誤今刪

李光春西臺奏議

乾隆府縣志

案光春樂清人西臺奏議見樂清志書目舊志誤

陳少垣雞肋集

乾隆志

案少垣名昌時以字行則翁長子瑞安人舊志誤

宋黃仁榮永嘉集

李知已永嘉集

俱見宋史藝文志

元章臺

永嘉縣志

明邑令汪循永嘉志

又東甌倡和集

郡

守鄧淮鹿城書院集

樂清蔡璞東甌詩集

國朝石門

勞大典甌江逸志

案已上均非邑人著作宜改入文外編

藝文誤

謝靈運橫陽還嶠上詩注一作遊嶺門山詩又行田登海口盤嶼山詩又白石逕爲民行田詩又斤竹澗越嶺溪行

詩

案橫陽卽平陽嶺門山在城南盤嶼白石斤竹澗俱樂
清地舊志誤

謝靈運歸塗賦

案賦中所云登青田之枉渚搜縉雲之遺迹實非指今
永嘉也舊志誤

孟浩然晚春臥病寄張八子容詩

案子容尉樂清詩中無一語及永嘉舊志誤

李頎送馬錄事赴永嘉詩

案詩言主印清淮邊又言楚雲飛面前非永嘉明甚全

唐詩錄永嘉作永陽舊志易陽爲嘉尤誤

趙凝送張又新之任詩

案全唐詩錄係趙嘏作舊志作凝誤

張又新常雲峰詩

案樂清有常雲山亦名靈府山詩云仙府靈臺莫漫登
是也舊志誤

李維楨送人之永嘉東李五峰詩

案五峰樂清李孝光也詩曰雁蕩落日照松扉又曰五
老峰前攬夕暉均指樂清稱永嘉統名耳舊志誤

侯一元贈王相山督學之楚詩又理說載名理篇四章

何白哀江頭詩 侯思芹贈司李嵇叔子遷守杭州詩

案已上三人俱樂清人舊志誤

陳水雲冷泉夜坐詩

案此係趙靈秀詩作陳水雲誤

災祥誤

晉太寧三年有白鹿銜花止於安固之白巖山

舊志引
府志

案安固卽今瑞安與永嘉無涉况太寧元年載有此事
疑本一事重出萬厯府志無是也今刪之

宋建炎三十二年大風壞屋覆舟

舊志引
宋史五行志
紹興三十二

年秋七月颶風大水

舊志引
府志

案建炎盡四年當作紹興下引府志云云卽一事而重出者也湯志已正之矣

元世祖至元二年蝗

舊志湯志引
元史五行志

至元五年芝草生於郡

城之松臺山狀如連雲文彩煜然

舊志湯志
乾隆府志

案世祖至元二年係宋度宗咸淳元年至元五年乃咸

淳四年其時永嘉屬宋不屬元考元史五行志順帝後

至元三年六月溫州蝗是舊志誤以後至元三年爲前

至元二年也今與府志五年一條均移泰定之後 又

案至元五年一條萬厤府志不載康熙府志作至元甲

子歲尤謬甲子乃世祖至元二年宋景定五年也 又

泰定元年以下六條自至元元年至二十七年均宜作
至正今誤作至元其至元十八年應作至正八年戊子

雜記誤

來斯灘在北閣仙溪昔有神人驅石之海一則

案來斯灘在樂清雁蕩見廣雁蕩山誌

高則誠撰琵琶記雙燭花交一則

案則誠名瑞安人元詩選云則誠寓鄞之櫟社沈氏
樓作琵琶記成按拍歌舞蠟炬二枝光忽交合因名瑞
光樓則人爲瑞人地爲鄞地與永嘉無涉

晉書本傳不言右軍嘗守永嘉一則 宋陵拾骸林處士

事與唐處士同一則 又論侯一元二則

案右軍守永嘉當入府志林平陽人侯樂清人均與本志無涉此皆隨手刺取府志之誤

存疑

古蹟疑

新城方輿紀要晉太寧初置郡議築城於江北岸去今城六里今溫州謂其地曰新城 舊志卽永寧故城今其地爲田野猶稱新城云

案唐書地理志武德五年以縣置東嘉州析置永寧安固橫陽樂成四縣疑江北之城武德時所置故稱新城

至貞觀元年仍省入永嘉也

前人皆言孤嶼在城南以此

讀書堂舊志引明一統志在舊郡治謝靈運讀書於此

謝靈運

讀書齋中舊書詩舊志引晏殊類要城內西偏有謝康樂

謝康樂

讀書齋

謝靈運讀書齋詩

案讀書堂疑卽讀書齋今併爲一

李集宅在茶山唐宗室隱居於此

案舊志仕績傳李唐卿唐河閒王孝恭裔自虔徙永嘉
茶山蒼墩李氏宗譜注云李唐卿其先出於唐河閒王
孝恭八世孫集考唐書宗室表河閒元王孝恭裔有先
遠者初名可集別有可信可誠可立則可爲輩行字亦

得省稱集自王至集正八世疑卽其人

芙蓉亭浙江通志湯志橐引明一統志在府治君子堂
在舊郡治舊名芙蓉亭

案上芙蓉亭疑卽下君子堂

職官疑

元縣尹趙搭納

案金華徵獻錄作大納宋濂浦陽人物志及舊志名宦傳永嘉縣學碑並作塔納上从土下無艸考搭納塔納大納音皆相近疑元人尙翻譯惟取音近不必有一定之字耶

明訓導王淵

案淵王氏譜作齋又儒林傳言洪武三年舉進士檢府縣志選舉門及科名碑俱無之蓋舉進士者應試之名非中式之謂且洪武三年鄉試四年乃會試焉得有三年之進士乎又訓導王元傳名澤傳疑係溥字之誤

選舉疑

宋宏詞科李仲意知真陽縣遷臨安府尙孝宗長公主授駙馬都尉公主諱柔正生而眉髮皓然有白祥之號賜湯沐萬戶告身四道後以入覲卒於臨安舊志乾隆府志同萬曆府志但注駙馬二

字馬二

案宋史公主列傳皆詳載公主封號及駙馬姓名其再嫁者亦著之惟高孝光寧四朝女皆早亡孝宗二女長公主已受封而亡其次未及封而亡長公主旣未下嫁又安得有駙馬哉且徧考宋史亦無柔正公主之號今檢蒼坡李氏譜但云真陽縣不載宏詞科並無遷臨安府事志與譜亦屬兩歧今姑仍舊志入宏詞科而附辨之又按朱氏蜃濱雜記謂仲意嘗通判溫州署中有公主梳妝臺舊址尤屬無稽

人物疑

鄭洪鄭君舉詩一卷

案洪字君舉號素軒有詩一卷爲秀水曹侍郎溶家藏

本題其簡端云是永嘉人蓋本賴良大雅集也而朱竹垞謂三衢人按顧奎光元詩選姓氏爵里考亦作永嘉人今從之

朱聳舊志隱逸作朱聳經籍作朱贊山川又作朱聳

案朱氏譜牒作朱聳然府志俱作聳今從府志

周頤真洞浮老人集

萬暉府志雍正通志乾隆府縣志

案通志周頤真永嘉人府縣志則云閩福清人至元丙子徙居永嘉當非無據今姑存其人於方外而刪其集

元陳秀民舊志文苑

案府志作溫州人縣分未詳今姑仍舊志

附錄

蒼山周氏女及笄未字汲水溪邊見一石卵潤澤可愛懷之卽墮落乃含口中不覺吞下遂有娠後產一白龍女驚死鄉人取其骸骨塑以泥藏置巖洞閑旱則迎之祈雨嘉靖十三年大旱縣尹周珫禱弗應有繫獄者稱係龍母族裔獻議迎龍母渡江及抵山川壇俱霏微雨護送有從行者負旗先驅戒勿展眾望雨久強展之風雨頓作龍負雲起如白氣舞於空中噴噴有聲開元寺溫衛治多拔仆惟山川壇龍母厥不動燭亦不滅雨傾蓋下不移時河溢入城嗣後亢旱禱輒應舊志
下同

梅大歎能神遊一友亦善其術會丁祭乃共處一室相戒各出神覩聖人受享狀至則境內百神畢集武士呵衛警蹕其友止門外不得前大歎術稍高盡其法力擠至靈星門亦止矣遙睇座中一巨星炯然諸神陪位擬於饗帝已而兩人各言之其語悉合

元延祐四年六月十七日晚有無舵小船飄至海島中界山地名燕宮內有一十四人五人穿青黃色服九人並白衣內一人攜帶小木刻字長短不等計三十五根其上刻畫不成字樣提挈葫蘆八枚內有青黃白色成串硝珠其人語言不辨本路圖畫人形船隻差官將各人起解江浙

行省十月中書省以聞奉旨訪通曉語言之人詢係海外婆羅公管下密牙古人氏凡六十餘人乘大小二船欲往撒里郎地方博易貨物途遇大風大船已壞惟十四人乘駕小船飄流至此有旨命發往泉州候有人往彼帶回本

國

明洪武八年八月有海舟至溫州港衛府差官到舟譯者黃宗起稱暹羅斛國王列參寶昆耶里哩哆囉祿於六月初一日恭遣正使冒嵒坤信副使詔瓊哆囉齋奉金文進貢白象方物前赴大明國朝見撒差巴寫寶招歐靄船裝載過海遇風飄至遂移舟泊溫州城下衛府差官送陸路

至行在其文色雄象命象奴於本府開元寺喂養內訪物
苾布西洋紅布兜羅綿被象牙胡椒黃蠟降真香蘇木至
九年始回本國

崇禎五年有番舶泊海口以桅舵損壞教人入地內覓料
匠爲守關兵船所覺強拽入港下其船艙底以金銀壓磚
艙內金寶無算閩郡官皆以勘驗爲名次第登舟理刑某
見黃金爲條長二三寸許亂揣懷袖靴桶皆滿蹣跚坐輿
歸猶快快不足乘夜各官將貨物盡起入城僕從因而驟
富發家者不知其幾一役得阿魏一器嗅之臭投之江一
役得算盤一具次早視之珠爲之也以壞船報上司查詰

數四彌縫而止船擋外沙浦未幾劉香入寇困城羣賊奔壞船破其水櫃下夾板中扛白金數萬去守城軍民從垛口遠瞭莫可如何或曰船內所裝卽劉香物故突犯剽劫取償民間爲地方劇禍云

國朝乾隆十八年六月十二日溫鎮左營守備於南龍洋面盤獲番船一隻男女五十二人并槍劍鐵炮火藥等物押護進口停泊內港其人髮鬈目圓睛綠衣褲相連上衣背鉗無數帽用紅紗紬摺捲露頂一頭目手執一物似如意頭用金鑲有女年可十七八髮下垂足跣自亦微圓美倩似中華少好女子言語俱不相通閱月廈門送到外夷

通事賴祿譯知是于系臘國人名龍番教魯羅邦芬封屬
國呂宋王下作判事官號亞里閒麻油駐管泰賢世賴地
方其手所執是彼國王給與三品職銜憑據有文憑三紙
隨身二是于系臘國王印文一是呂宋國王印文各蓋其
國王面刻就印刷五年任滿攜帶眷屬回見呂宋國王過
海遇大風約經百日飄至此時當夏秋風信不便鎮道諭
令將船內人口及器物搬移上岸暫住校士館飛報大憲
摺奏動帑給其食用并修葺船隻凡四月風順遣水師
弁兵送至廈門令往販呂宋商船便帶歸國

葉尙高祭文廟文嗚呼天兮何忍嗚呼人兮何辜嗚呼斯

文兮幾於喪嗚呼吾道兮從是汚嗚呼變生叵測兮振古
未有嗚呼禍起非常兮諸夏所無嗚呼棟桷猶存兮悵離
離之彼黍嗚呼髮膚致毀兮悲蓼蓼之匪莪嗚呼裸將於
廟兮何莫非先朝之彥嗚呼駿奔於堂兮殊異於聖人之
徒嗚呼裸體文身兮斷不肯效尤於虞仲嗚呼被髮左衽
兮然後知受賜於夷吾嗚呼悠悠我思兮自分爲識君臣
之螻蟻嗚呼渺渺予懷兮豈同不知春秋之蟪蛄嗚呼旣
不克在泮獻囚兮如皋陶之淑問嗚呼亦僅等敗軍之將
兮與亡國之大夫嗚呼雖不得與于祭兮猶惄惄於泗水
之濱尼山之土嗚呼余小子固有志兮爰采采乎西山之

蕨北海之蒲嗚呼濶毛可以昭明信兮何羨乎腥膻之肥
腯嗚呼白水可以薦馨香兮奚取夫清酒之百壺嗚呼吾
師乎嗚呼吾師乎雖泰山之已頽兮曾林放之不如乎

雜錄

永嘉有一人患瘡藍縷寒餒市中求乞有薛主簿憫之來
與飲食去亦不謝薛後暴卒陰府追至爲前生冤家執論
遣令勘對薛方回身報大舅至王起身迎謁薛視之乃瘡
者也遂高聲叫相救瘡者驚曰主簿何爲來此乃謂王曰
老舅承斯人顧盼可爲拔之乎王謂吏檢簿書云有三十
年在王乃謂薛曰能作善業可得還薛曰如得生還願造
尊勝幢子償解冤讐王命押回引從舊路歸至所居門首

似夢覺家人號泣曰一宿矣後遂每日一食輒建幢子專持念其瘞者卽不復至乃圖像供養焉

唐傅亮靈應錄

山人黃子復擅巧思製木偶運動以機無異生人嘗刻美
人手捧茶托自能移步供客客舉甌啜茗卽立以待甌返
於托卽轉身向內而入又刻爲小者置諸席上以次傳觴
其行止一視觴之舉否周旋向背不須人力王陽德曾捐

十金購谷簾秋古琴僅存壞板數片黃爲重造卒成完器

聲音清越冠絕

一時岐海瑣譚

郡西敵樓在放生河畔康熙間郡大夫建以瞰敵故名或
云宋時方臘之亂教授劉士英禦敵所建然亦無攷嘉慶

甲戌城守金國標倡捐重建上祀關帝下洞其門以便往來休憩道光初元燬後再建陳遇春易其名曰笛樓有笛樓記見梧竹山房文彙今樓圯改爲茶亭

相傳有張氏子與李女比鄰幼結婚及長張母寡且貧李謀離婚女不從會元宵觀燈女見張卽捨伴從之訴衷曲知婚無合期行至橋上相抱投水杳無知者次年水中蓮開並頭人皆駭異募人掘根得二屍蓮莖各出一口卽張子李女也邑令以其不失貞義合棺題石名鴛鴦橋曰雙蓮當時有詠其事者曰初盟不負鐵心堅割斷塵緣作水仙烏鵲巧催橋上度青娥長展鏡中妍生前果墮相思樹

死後花芳並蒂蓮何處宰官身可見幻髮嬌小愛河邊見

種書堂校刻集異編

案宋楊蟠有雙蓮橋詩似即指此蓋唐時事也

陳相心以拆字名於公卿間推原禍福考索成敗無不驗

見楊維楨拆字說

舊府縣志方技

道光丁亥西山護國寺門外佛光如火人見而異之掘地得方石一下埋石琰二俱鐫佛像旁注一萬人同造後五百年有福慧者重興十五字陳遇春誌異詩注云此寺宋紹興二年建以其時則可矣福慧者不知何人或寓言亦未可知詩曰無端光焰起蒼厓五百年前事已排勒石分明苔不蝕未知當日爲誰埋盛衰遞嬗數禪關香火因緣

詎等閒誰是如來今再世黃金布地笑開顏一時名流題

詠甚多

陳遇春護國寺誌

冥財庫爲中元焚楮之所向在開元寺右卽今倉聖祠基
道光中歲貢黃鸝揚以字灰狼籍捐建磚爐於寺後每屆
中元無論大小戶以紙糊箱篋滿貯冥錢投入庫中焚之
追薦宗親寓追遠報本之意相傳此舉自明季始所從來
遠矣

補遺

山川

溫城七山成斗形

王十朋駕幸溫州次僧宗覺韻詩注

七山如北斗

楊蟠浩然詩集

案志稱環城之山舊名九斗今據王楊二君詩止稱七
山然則九斗之名殆起北宋後歟

歐乘補

雅山

宋文憲公濂送覺初禪師還江心寺序師出世建葉聖泉遷永嘉雅山

鳳山

何无咎汲良楚先世由玉環遷樂之迎恩橋中歲卜居郡郭鳳山

社學山

曾丹橋詩九山叢裏社學山注在郡北鯉

魚橋

界黃土異吉之間有小阜名毬山

毬山

案已上諸山皆郡縣志所未載

歐乘補

牛眠山

在四十五都昆陽山如牛形首尾相肖

又有鹿角山

三龍井

在昆陽相傳有三龍洛此劃成三井深數百丈雖大旱井水不竭

祠廟

列女瞿素祠在九都瞿嶼山麓

華光廟一在松臺山麓一在嘉福寺巷嘉慶元年毀於颶
風光緒五年里人重建

崇奉華光大帝卽開窗括異志所稱華光如來也

選舉薦辟

元茂異黃

一龍字國寶江府教授舊志佚據至順鎮江志陳友龍鎮江府淮海書院記畧補

人物義行

黃中字通理弟宏芳原名宏智字明遠居泰清鄉藤橋兄
第六人中芳皆讀書尙義時邑令每以豐熟之年採買常
平倉穀蠹役勒派小民賠累不堪泰清臨江二鄉曾於康
熙中控禁勒碑厥後舊禁漸弛吏役追呼乾隆丙申中乃
搜揚舊碑與金振玉周維新同控撫藩九月暘奧楊五兆

等拒捕毆官中懼歸里丁酉夏藩司提審中與叔父卜南
名欽鵬號萬里金振玉及黃岡周雲飛等赴省寓豐樂橋
吉祥寺旣而中疾作乃喚芳至以此事屬之爲易今名勉
其留芳也六月廿七日中歿殯於西湖芳哭之以詩曰馳
驅越嶠渡錢塘凜冽秋風砭骨涼豐樂橋邊誰是樂吉祥
寺裏未爲祥風敲蘋葉愁千片露滴松枝淚萬行多少候
蟲鳴唧唧令人幾斷九迴腸八月輿櫬歸戊戌歲藩司委
杭府台府及溫府會鞫六月廿三日集審閏六月望日復
審懸案未結鄰村張某扳得康熙間立碑全案有前督覺
羅滿奏奉 聖諭及前縣林發下碑記硃印如新芳乃

於臨審時遞呈而卜南以憂懼成疾未能赴審程守曰楊
總督諭常平買補如辦不善先究官後究民今爾叔不到
案何能結壬寅歲卜南疾歿席令閱供通詳完結六月芳
與金振玉黃岡周雲飛四人先後出獄舊禁亦復闔邑小
民如出水火而衽席之矣兩鄉戚友欲資助芳不受乃橐
筆授徒以自給嘉慶丙辰芳館戈田金氏友人詢其顛末
而記之如右

採訪冊
下同

呂從龍字協南歲貢生性倜儻好義邑故設莊長督催錢
糧役富民爲之雖生監不免充是役者爲吏胥魚肉家率
破從龍憫之偕貢生邵炳生員張樹德等凡十八人展轉

憩大吏自乾隆五十四年至六十年歷七寒暑有司利陋規皆左袒豪胥不得直而嫉從龍樹德尤甚陰中以他端襯其衣頂會秦公瀛任溫處道深燭其弊旋攝臬司與方伯謝公啟昆力持之爲請諸撫院事得白勒碑申禁卒余莊長里人德之戶祝於先農祠奉秦謝二公栗主併及從龍同時有吳江者字成桂號仁溪輕財貴義亦以謀革莊長事左右其間者也壬子歲貢生巨川候選州同

吳天衢西溪甌渠人孝友敦行慷慨樂施道光十四五年連歲災歉天衢爲賑饑計築巨室以工代賑積至一萬三千餘工里之貧者咸就食焉一日大雨巖牆傾圮工人壓

焉急命出之則壞牆上合下開空其中得無恙人謂其散財救贍故得此報年六十四而終子孫世守義方姪通瀾性孝友崇儉樸緩急濟人貧者不責償子三人皆游庠學憲丁給慶徵詒穀額表其間族有吳時輻者敦厚好施每歲暮分錢米饋親隣之貧者又吳浩武庠生以孝友聞里有溪水暴漲深不可測人多病涉浩獨建石橋行者德之其他濟饑療病尤衆人咸謂甌渠吳氏有世德云

人物文苑

明朱道魁字墨耀良暹孫相溪人郡庠生貢入成均壯歲棄舉業韜晦高尙終其身爲溫處二郡義學山長王瓊朱

諫王澈王激皆其弟子著有鍾山詩集墨臞養拙集二十卷其卒也鄉人賦鍾山鶴怨以哀之王激爲之序

朱氏譜

人物忠義

丁天義民金和春業農精椎算好檢拾字紙化灰並收埋暴露骸骨同治壬戌四月十二日粵匪入境被擄欲用爲鄉導和春大罵謂汝等殺人放火我肯從汝耶賊怒殺之

孝女

陸茂山女

刲股療母病復

烈婦

王南焮妻林氏

雍正四年十月南焮溺海死柩葬於永昌堡外氏每朝奔墓而哭母欲奪其志誓與

母絕一日焚香浴體服金
不死卒自縊死年二十五

林儒士某妻羅陽夏氏

結禱一載夫亡以死殉焉進士林

媛嬪子宗子寵勉一心辛勤十指及爾同歸靡它自矢

情重三生誓堅一死死者已矣傷如之何匪石莫轉無

瀾豈波招魂水澳畢命山
阿香魂常馥貞珉不磨

古蹟金石

徐德寶妻潘氏墳塋告后土文石碣

維寶慶二年歲丙戌六月甲申朔庚寅日陽上夫徐德寶
男徐亞雙次男阿金女亞前次女住殊云等謹立口告于
五方五帝山川百靈后土陰官丘丞墓伯阡陌諸神切念
德寶蓋爲先妻潘氏九娘子於今年二月初五日歿故龜

筮協從相地惟吉宜於溫州永嘉縣賢宰鄉羅浮山村黃
家山後之原或東□□□地□爲宅兆安厝謹用九萬九
千九百九十九歲□□也□買地壹段□止青龍右止白
虎前止朱雀後止玄武內方勾陳分掌四□丘□□□
□□□路□齊整阡陌千秋万歲□□□□若輒干犯茲
禁將軍亭長收付河伯今□□□酒飯百味香□共爲信
誓財地交相分付工匠動土營造墳墓安厝已後永保休
吉見人歲月主保人今日直符故氣邪精不得□□□有
居者永避万里若違此約地府主吏自當其禍主人內外
存亡悉皆安吉急急如五帝主者律令寶慶二年辛丑月

十五日丙申

右石碣得於三十二都千石莊高廣不及二尺今藏瑞安資政第孫氏寶慶爲宋理宗紀元之一

溫州府主戴爺問明判案碑記

右碑在十二都茶山實際寺正殿右壁嘉靖四十二年僧廣滔正訪立石據碑文因寺僧欲賣項姓祖捨田畝涉訟控經本道批府審明又云正統十二年立有碑記原係鄉宦黃文簡公撰文備述古蹟今此碑未見其稱本道爲分巡老爹府主爲戴爺可見當時稱謂之質直其文殘缺詞亦俚俗今不錄

望歸亭碑記在四十一都廊下將軍菴道左侯一元撰嘉靖四十三年爲孝子朱尙綜立

碑文
未拓

旌異松鶴處士康公墓誌在十八都郭溪水閘頭

案松鶴處士疑卽康從理

碑文
未拓

坊表

貞烈坊在十九都宋與河南爲王宗培聘室南氏立

節孝坊一在五都上河濱爲儒童邵瑞璋妻張氏立一在十都阮郎洋爲孫秀環妻王氏立

新志自開局以來首尾不及三年卷帙浩繁增舊志三倍有半所費止三千七百餘緝視鄆鎮二縣志用

至二萬三萬者相去懸絕惟校讎之役殊非易易適
兒子文儕

自邗上假旋竭三月之力專任其事改正

訛謬不勝塗乙多至八千餘字其脫畧複衍之處刊
落重鐫者十餘幅尙未能毫髮無憾甚矣校勘之難
也所冀閱者指摘瑕疵藉資補救則幸甚矣再是書
告成於光緒七年後來事蹟不便羼入以示限斷後
之人慎勿妄爲補刊致亂體例如其事應入志乘恐
其久而湮也宜刊永志續補別著年月以備遺忘庶
無攬越之弊咸弼又識